

Siunnersuummut nassuiaatit

Nalinginnaasumik nassuiaatit

1. Aallarniut

Biilinit innaallagissamik ingerlatillinnut, brintimik ingerlatillinnut aamma plug-in hybridbiilinit akitsuutinik akiliinngikkallarnissaq kontomut pingaarnermut 24.11.10 aamma 24.11.11-mut oqaasertaliussat naapertorlugit 1. januar 2020-imi atorunnaassaaq.

Biilit innaallagissamik ingerlateqartut ineriartornerat siuariartorluartoq nunarsuaq tamakkerlugu takuneqarsinnaavoq. Ilaatigullu illoqarfinni annerusuni arlalinni biilit dieselimik ingerlateqartut atorunnaarsinnissaannut suliniuteqartoqarpoq. VW, BMW Mercedesilu kiisalu japanimiut biiliorfissuisa annerit siunissami biiliniq niuernermit biilit innaallagissamik ingerlateqartut akuunerat nassuerutigaat. Kinap, Frankrigip Tuluillu Nunaata 2030-40-mi biilit benziinamik dieselimillu ingerlateqartut inerteqqutigineqarnissaat siunniuppaat. Taamaammallu biilit innaallagissamik ingerlateqartut ilimagineqaqqaartumit siusinnerusukkut biilinit annertunerusumik akuunissaat naatsorsuutigineqarsinnaavoq.

Biilit innaallagissamik ingerlateqartut Nuummi illoqarfinnilu anginerusuni allani qamutinit motorilinnut nalinginnaasunut sanilliullugu ullumikkut atorneqarsinnaareerput. Biiliniq innaallagissamik ingerlateqartunik eqquusuinermit akitsuuteqartitsisoqalerpat biilit innaallagissamik ingerlateqartut qamutinit motorilinnut nalinginnaasunut unnammillerniarnerat ajornakusoornerulissaaq, taamaalillunilu Kalaallit Nunaata CO2-mik aniatitsinerata tamarmiusup annikillisinneqarnissaanik Naalakkersuisut kissaataannut akerliussalluni aammalu qamutit motorillit ikummatissamik nunap iluaneersunik atuinngitsut atorneqarnerisa annertusarniarneqarnera ajornakusoornerulissalluni.

Tamanna tunngavigalugu akitsuuteqartitsinngikkallarnerup naanerani biiliniq innaallagissamik ingerlateqartunik brintimillu ingerlateqartunik eqquusuinermit akitsuuteqartitsisoqassanngitsoq aalajangiunneqarpoq.

Akerlianik plug-in hybridbiilit ulloq 1. januar 2020-imit 1. januar 2025-p tungaanut atuutilersumik akitsuusersugaalernissaat aallartisarneqassaaq.

Plug-in-hybridi piumasaqaatit malillugit atorneqarpat, tassalu motori ikummatissamik atuisoq pisariaqarluinnartillugu atortarlugu imaluunniit isorartunerusumik ingerlaassatilluni aatsaat atortarlugu, plug-in-hybridi qamutinit motorilinnut nalinginnaasunut sanilliullugu CO2-mik

aniatitsinermut annikillisaataasinnaavoq, taamaattorli motoritaata ikummatissanik atuisup immikkut atorneqarsinnaanera pissutigalugu plug-in-hybridi avatangiisinut ilumut iluaqutissartaqarnera qulakkeerneqanngilaq.

Siunnersuummittaaq qamuterallannut kiisalu qamutinut motorilinnut nunakkoortunut minnerusunut eqqussinermi akitsuut atorunnaarsinneqassaaq.

Inuit biilii pillugit suliassaqaarfimmi maanna akitsuutit aqqissugaanerata nassataraa qamutit motorillit minnerusut, soorlu assersuutigalugu nunat ilaanni microbiilit piumaneqarluartut siunertaanngitsumik annertuumik akitsuuteqartinneqarneri. Pingaartumik innuttaasut annikinnerusunik isertitallit imaluunniit killilimmik biilernissamut pisariaqartitsisut akitsuutit aqqissugaanerata allanngortinneqarnera iluaqutigissavaat, taamaasilluni eqqussuinnermi akitsuut taamaasillunilu biilit fakturami appasinnerusumik nalillit tunineqarneranni akiat appassammat. Siunnersuummut atatillugu naatsorsuutigineqarpoq, aqqissuusseqqinneq annertunerpaatigut nunatta karsianut iluanaarutitigut nikisitsissanngitsaq. Tamatuma kingunerisaanik inuit biiliisa 75.000 kr.-it sinnerlugit fakturami nalillit akitsuutaat qaffanniarneqarpoq.

2. Siunnersuummi immikkoortut pingaarnertit

Qamutit motorillit taamaallaat innaallagissamik brintimillu ingerlateqartut kiisalu plug-in hybridbiilit, batteriiniq immeqqittakkanik nukissiamut katersivillit ullumikkut qamutit motorillit taamaallaat innaallagissamik brintimillu ingerlatillit eqqunneqarneranni nioqqutissanik eqqussuinnermi akitsuummik aamma qamutit motorillit akileraarutaannut ilaatinneqanngillat, takuuk 2019-imut Aningaasanut Inatsimmi konto pingaarnertut 24.11.10 aamma 24.11.11 oqaasertaliussat.

Biiliniq innaallagamik brintimillu ingerlateqartunik eqqussuinnermi akitsuuteqartitsinnginneq maanna atuuttoq suli atuutsinneqassasoq siunnersuutigineqarpoq.

Akerlianik siunnersuutigineqarpoq, plug-in hybridbiiliniq eqqussinermi akitsuuteqartitsinnginneq atorunnaarsikkiartuaarneqassaaq, taamaaliornikkut Inatsisartut inatsisaata atuutilersinneqarnerannit 50 %-imiit 2025-p tungaanut ukiumut 10 %-tikkaarlugit qaffatinneqartassalluni, piffissamilu tassani tamakkiisumik akitsuusiisoqartalissalluni.

Siunnersuummittaaq qamuterallannut kiisalu qamutinut motorilinnut nunakkoortunut minnerusunut eqqussinermi akitsuut atorunnaarsinneqassaaq (ATV-nik imaluunniit 4-hjuliniq taagorneqartut).

Maannamut qamuterallannik eqqussinermut tunngavimusimavoq aalajangersimasumik akitsuut qamuterallannut ataatsinut 22.000 kr.-i, qamutilli motorillit nunaannakkoorutit minnerusut ullumikkut qamutit motorillit sisamanik assakaasullit nalinginnaasut assigalugit akitsuuserneqartarput, tak. Inatsisartut inatsisaanni § 1, imm. 1, nr. 21, litra a-mi aalajangersagaq. Qamutinulli motorilinnut nunakkoorutitut minnerusunut akitsuut nioqqutissanik eqqussuineq annissuinerlu pillugu Inatsisartut inatsisaanni nr. 18, 30. oktober 1992-imeersumi § 20 naapertorlugu pisinnaatitsissutip nassataanik 5.000 kr.-imut appartinneqarpoq, tak. nioqqutissanik eqqussuineq annissuinerlu pillugu Namminersorlutik Oqartussat nalunaarutaanni § 33.

Peqatigitillugu inuit biiliinut 75.000 kr.-it ataallugit fakturami nalilinnut, 50.000 kr.-imik akitsuuteqarnissaat aalajangerneqassasoq, kiisalu inuit biillinut 75.000 kr.-it sinnerlugit fakturami nalilinnut, fakturap nalingata 125 procentianik akitsuuteqarnissaat aalajangerneqassasoq siunnersuutigineqarpoq.

Siunnersuut inatsimmut atuuttumut sanilliullugu	
Oqaasertai atuuttut	Inatsisissatut siunnersuut
	<p>§ 1</p> <p>Nioqqutissanik eqqussuinnermi akitsuutit pillugit Inatsisartut inatsisaanni nr. 19, 30. oktober 1992-imeersumi ilaatigut Inatsisartut inatsisaanni nr. 5, 6. oktober 1999-imeersumi kingusinnerpaamillu Inatsisartut inatsisaanni nr. 2, 25. maj 2016-imeersumi allanngortinneqartumi, tulliuttut allannguutigineqarput:</p>
§ 1, imm. 1, nr. 20.	<p><i>§ 1, imm. 1, nr. 20 atorunnaarsinneqarpoq</i></p> <p>2. § 1, imm. 1, nr. 21-mi litra e-p kingorna ilanngunneqassaaq litra f:</p> <p>” f) Plug-in-hybridbiiliniq, batteeriniq innaallagialaq atorlugu immeqqinneqarsinnaasunik ingerlatilinnik aammalu immeqqinnermi ataasiinnarmi annikinnerpaamik 20 km-inik ingerlasinnaasunik eqqussinermi taakku akilerneqarneranni nalingata 50 pct.-iannik akitsuuteqartitsisoqassaaq.”</p>

<p>a) Inuit biilii: Akitsuut aalajangersimasumik 50.000 koruuniusoq, taassumalu saniatigut fakturami akiata, 50.000 koruuninit annerusup 150.000 koruuninilli minnerusup 100%-ia aammalu sinneruttup 125%-ia akilerneqassapput.</p>	<p>2. § 1, imm. 1, nr. 21, litra a, ima oqaasertalerneqarpoq: ” a) Inuit biilii: Fakturami naliusup 75.000 kr.-i qaangingippagu, 50.000 kr.-imik akitsuusiisoqassaaq. Fakturami naliusup 75.000 kr.-i qaangerpagu, fakturami naliusup 125 procentianik akitsuusiisoqassaaq”</p>
<p>§ 3, imm. 1, nr. 1. Akitsuuserneqartussaannngitsut makkuupput: 1) Qamutit motorillit, tak. § 1, imm. 1, nr. 21, a) qatserutitut annaassiniutitullu immikkut sananeqarsimasut taamatuinnarlu atorneqartut, b) ambulancetut toqusunullu assartuutitut iiranikkut sananeqarsimasut taamatuinnarlu atorneqartut, c) sulinermi immikkut atugassatut sananeqarsimasut, sananeqaamminni assartugassanik inunnilluunniit aqqusinermi assartuutissatut naatsorsuussaannngitsut, d) maskinat sulinermi atortut traktorillu, e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut.</p>	<p>3. § 3, imm. 1, nr. 1, ima oqaasertalerneqassaaq: ” § 3. Akitsuuserneqartussaannngitsut tassaapput: 1) Qamutit motorillit, tak. § 1, imm. 1, nr. 21, a) qatserutitut annaassiniutitullu immikkut sananeqarsimasut taamatuinnarlu atorneqartut, b) ambulancetut toqusunullu assartuutitut immikkut sananeqarsimasut taamatuinnarlu atorneqartut, c) sulinermi immikkut atugassatut sananeqarsimasut, sananeqaamminni assartugassanik inunnilluunniit aqqusinermi assartuutissatut naatsorsuussaannngitsut, d) maskinat sulinermi atortut traktorillu, e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut f) qamutit motorillit nunaannakoorutit minnerusut sisamanik amerlanernilluunniit assakaasullit, aamma g) qamutit motorillit taamaallaat innaallagissamik brintimillu ingerlatillit.”</p>
	<p>§ 2 Inatsisartut inatsisaat ulloq 1. januar 2020-imi atuutilissaaq.</p>

	<p><i>Imm. 2. § 1, imm. 1, nr. 21, naapertorlugu Inatsisartut inatsisaata atuutilersinneqarnerani 50 %-imiit 2025-p tungaanut ukiumut 10 %-tikkaarlugit qaffattinneqartassalluni, piffissamilu tassani tamakkiisumik akitsuusiisoqartalissalluni.</i></p>
--	---

3. Pisortanut aningaasaqarnikkut allaffissornikkullu sunniutissai

Qamuteralaat ATV-llu eqqunneqarnerani akitsuummik akiliisussaajunnaartitsinermi pisortanut iluanaarutissaagaluanik annaasaqarnermik kinguneqassaaq. Piffissami 2014-2017-imi qamuteralannik ATV-nillu eqqussinermi ukiumut agguaqatigiissillugu iluanaarutaasimapput 6.017.000 kr.-it aamma 427.500 kr.-it. Taamaattumik katillugu 6.444.500 kr.-inik iluanaarutininik annaasaqarneruvoq.

Aappaatigut plug-in hybridbiiliniq eqqussinermi akitsuummik akiliisussannginnerup atorunnaarsikkiartuaarneranut atatillugu iluanaaruteqarnerusoqassaaq. Piffissami 2014-2017-imi agguaqatigiissillugu ukiumut plug-in hybridbiilit 65-it eqqunneqartarput. Akiligassat nalinga agguaqatigiissillugu 250.000-iusoq eqqarsaatigissagaanni, iluanaarutaanerusut katillugit ukiumut 4.000.000-iussapput ukiumut 8.000.000 kr.t missaannik qaffattarlutik, ukiuni taakkunani tallimani atuutilersikkiartuaarneqassalluni.

Plug-in hybridbiilit eqqunneqarnerani akitsuuteqartitsinnginnermik atorunnaarsikkiartuaarnerani iluanaarutaanerusussaasut missingernerat annertuumik nalorninarpoq. Piffissami 2014-2017-imi 8, 36, 77 aamma 137-inik biiliniq eqqussisoqarpoq. Allatut oqaatigalugu ukiuni kingullerni annertuumik allanngortoqarsimavoq, nalorninarporlu, akiligassat nalingani eqqussinermi akitsuutitut niuerfik qanoq qisuariassanersoq. Peqatigitillugu plug-in hybridbiilit eqqunneqartut akiisa nalingi pillugit naatsorsuutininik peqanngilaq, taamaasilluni akiligassap nalinga agguaqatigiissillugu 250.000 kr.-iusoq missingiutaavoq.

Ataatsimut atorunnaarsitsiartuaarnerup aallartinnerani iluanaarutissaagaluanit annaasaqaatigineqartussa 2, 4 mio. kr.-iniussaat, atorunnaartitsiartuaarnerullu naggataani 1,9 mio. kr.-inik iluanaaruteqarnissaq naatsorsuutigineqarpoq. Iluanaarnerunerup annertussusaanut annertuumik apeqqutaavoq, plug-in hybridbiilit eqqussinermi akitsuuteqartinneqalernerannut niuerfik qanoq qisuariassanersoq.

Biilit eqqunneqartut amerlassusaat nikeriarujussanngitsoq naatsorsuutigineqarpoq, biilit suussutsinit allanit taarserneqarsinnaammata. Aappaatigut kompositionseffekteqarnissaa naatsorsuutigineqarsinnaavoq, t.i. biilit qanoq ittut eqqunneqartartut allanngornerat. Plug-in hybridbiilit biilinit innaallagiatortunut brintimillu ingerlateqartunut nuuttoqarpat, iluanaarutaanerusussat missingernerat qaffasippallaassaaq, biilimmi taakku sulii eqqussinermi akitsuuteqartinneqanngimmata.

Matumani naatsorsorneqanngilaq inuit biiliinik fakturami nalikinnerusunik piumasaqarnerup allanngorsinnaanera. Peqatigitillugu naatsorsorneqanngilaq inuit biiliinik piumasaqarnerup qaffassinnaanera. Ataatsimut isigalugu tunngavigineqarpoq, allanngortiterineq atorunnaarsitsiartuaanerp naggataani nunatta karsianut iluanaarutitigut nikisitsissanngitsoq.

Siunnersuut allaffissornikkut annertunerusumik sunniuteqassanganneqanngilaq.

4. Inuussutissarsiornermut aningaasaqarnikkut allaffissornikkullu sunniutissai

Inuussutissarsiummik ingerlataqartut hybrid-pluginbiilinik pissarsisarnerminni aningaasartuutaat amerlissapput, akitsuuteqartitsinnginnerup atorunnaarsikkiartuaarneqarnera ilutigalugu. Assigani naatsorsuutigineqarpoq inuit biiliinik 75.000 kr.-it sinnerlugit fakturami nalilinnik pisinernut aningaasartuutit qaffannissaat, aappaatigulli qamutiniq motoorilinnik 75.000 kr.-it ataallugit fakturami nalilinnik pisinermi aningaasartuutit appassallutik.

Siunnersuut inuussutissarsiornermut allaffissornikkut sunniuteqassanganneqanngilaq.

5. Avatangiisinut, pinngortitamut inuillu peqqissusaannut sunniutissai

Plug-in hybridbiilit eqqussuinermit akitsuuteqartinneqannginnerat maanna attuuttup atorunnaarsikkiartuaarneqarnissaanut siunnersuut plug-in hybridbiilit siaruariartornerannik annikinnerulersitsissasoq ilimagineqarpoq. Manna tikillugu plug-in hybridbiilit avatangiisinut pitsaaqutai nalornissutaapput, taamaammallu siunnersuutip partikiliniq aniatitsinermit sunniutissaa siumoortumik oqaatigiuminaalluni.

Qamutit motoorillit nunakkoortit minnerit qamuteralaaq akitsuummumut ilaajunnaarsinnissaannik siunnersuuteqarneq, taakku atugaaneriniq annertuseriartitsisussatut ilimagineqarpoq, taamaalillunilu qamutitit motoorilinnit taakkunanga CO₂-mik aniatitsinerulernermik nassataqassataqassaaq.

Taamattaarluni qamutit motoorillit 75.000 ataallugit nalillit akitsuutaannik appaanissaq qamutiniq motoorilinnik minnernik eqqussuinermit annertusisitsissasoq ilimagineqarpoq,

innuttaasummi amerlanerit qamutininik mootorilinnik pisinissamut periarfissaqalissapput. Qamutit mootorillit amerlanerulernerat CO2-mik aniatitap annertusineranik nassataqassaaq.

6. Innuttaasunut sunniutissai

Innuttaasut hybrid-pluginbiilininik pisisut biilit eqqunneqarnerannut atatillugu ataasiartumik aningaasartuutininik sipaaruteqarsinnaajunnaassapput. Akitsuuteqartitsisoqanngikkaluartoq hybrid-pluginbiilit eqqunneqartut maannamut ikittuinnaat eqqunneqarnikuupput. Plug-in-hybrid biilit akitsuusersorneqalerpata hybrid-plugin-biilininik eqqussuineq annertuumik annikilleriassasoq ilimagineqartariaqarpq.

Inuit biilininik 75.000 kr-it sinnerlugit fakturami nalilinnik pisinermi innuttaasut aningaasartuutaat qaffariassapput, aappaanili inuit biilininik 75.000 kr.-it ataallugit fakturami nalilinnik pisinermi aningaasartuutaat appassallutik.

Siunnersuut allaffissornikkut innuttaasunut sunniuteqassanganneqanngilaq.

7. Sunniutissat allat annertuut

Siunnersuut allanik annertuunik sunniuteqassanganneqanngilaq.

8. Oqartussaasunik, kattuffinnik il.il. tusarniaaneq.

Siunnersuut UKA2018-imi Naalakkersuisunit saqqummiunneqartoq pingaaruteqarnera peqqutigalugu siunnersuut saaqummiuteqqinneqartoq, kingusinnerusukkulli naalakkersuinikkut suliaqarnermik peqquteqartumik utertinneqarluni. 2018-imik siunnersuutigineqartumit siunnersuutigineqartup uuma taamaallaat allaassutigaa Inatsisartut inatsisaata atuutilersinneqarneratigut plug-in hybridbiilit tamakkiisumik eqqussuinerimi akitsuuserneqartussaanninnerat, eqqussuinerimili akitsuuteqartittsinnginneq maanna atuuttoq ukiuni tallimani atorunnaarsikkiartuaarneqartussaalluni.

Tamanna tunngavigalugu siunnersuutip aammaarlugu tusarniaassutigineqarnissaa pisariaqartinneqarsimanngilaq. Akerlianillu tusarniaanerup ingerlanneqarsimaneranut nalunaarusiaq tusarniaanermilu akissutigineqartut UKA 2018/198 tusarniaanermi akissutit tiguneqartut inatsisillu nassuiaatittaannik misissuinerit taakkunungalu ilanngussat innersuussutigineqassapput.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Snescooterinut akitsuut atorunnaarsinneqassaaq.

Nr. 2-mut

Siunnersuutigineqarpoq, inuit biiliinik 75.000 kr.-it ataallugit fakturami nalilinnik eqqussinermi akitsuut, 50.000 kr.-imut aalajangerneqassasoq.

Inuit biiliinik 75.000 kr.-it sinnerlugit fakturami nalilinnik eqqussinermi akitsuut, ataatsimut fakturap nalingata 125 procentianut aalajangerneqassaaq. Inuit biiliat ass. Eqqussinermi 120.000 kr.-inik fakturami naleqarpat, akitsuut ima naatsorsorneqassaaq 120.000 kr. x 125 procent = 150.000 kr.

Nr. 3-mut

Siunnersuutigineqarpoq, qamutit motorillit nunaannakoorutit minnerusut sisamanik amerlanernilluunniit assakaasullit, Kalaallit Nunaanni angallanneq pillugu inatsimmi § 2, imm. 1, nr. 3 naapertorlugu qamutiusut motorillit akitsuuteqartinneqarunnaassasut.

Aalajangersakkami assersuutigalugu ilanngunneqarput ATV-t aamma UTV-t tassaasut qamutit motorillit immikkut ittut nunaannarmi ingerlanissamut tulluarsakkat, taamaattumillu mangertumi assersuutigalugu betonimi imaluunniit asfaltimi ingerlanissamut tulluarsaangaangitsut. Qamutit motorillit sisamanik assakaasoqakkajupput kiisalu minnerusumik usinut ilitsiveqarsinnaallutik. Qamutit motorillit aquneqartarput motorcykelit aquutaasa assignanik aquuteqarlutik.

Aammattaq qamutit motorillit innaallagissamik imaluunniit brintimik ingerlatillit eqqussinermi akitsuuserneqassanngitsut siunnersuutigineqarpoq.

Aalajangersakkami pineqartut taamaallaat tassaapput biilit innaallagissamik brintimillu ingerlatillit, batterimik innaallagissamik immeqqinneqarsinnaasumik ingerlateqartut aammalu allamik atuinikkut ingerlanneqanngitsut. Brintibiilit ingerlataat brinti, soorlu elektrolyseproces atorlugu pilersinneqarsimasinnaavoq, tassa erngup silaannaallu avissaartinneqarnerisigut. Biilit allanik ingerlateqarnissamut atortulersugaareersimassanngillat.

§ 2-mut

Inatsisartut inatsisaat 1. januar 2020-imi atuutilissaaq.

Imm. 2 ikaarsaariarnermi aalajangersagaavoq 1. januar 2025 aallarnerfigalugu plug-in hybridbiilit tamakkiisumik akitsuuserneqarnissaannik kinguneqartussaq.

Ikaarsaariarnermi 1. januar 2025-p tungaanut akitsuutit ima qaffatsikkiartuaarneqassapput:

- 1. januar 2020 aallarnerfigalugu: Akitsuutip tamakkiisup 50% -ia.
- 1. januar 2021 aallarnerfigalugu: Akitsuutip tamakkiisup 60% -ia.
- 1. januar 2022 aallarnerfigalugu: Akitsuutip tamakkiisup 70% -ia.
- 1. januar 2023 aallarnerfigalugu: Akitsuutip tamakkiisup 80% -ia.
- 1. januar 2024 aallarnerfigalugu: Akitsuutip tamakkiisup 90% -ia.